

# 宣宗成皇帝實錄/卷386



以2024年11月8日从维基文库导出

大清宣宗效天符运立中体正至文圣武智勇仁慈俭勤孝敏成  
皇帝实录卷三百八十六

监修总裁官经筵日讲起居注官太子太保体仁阁大学士文渊阁领阁事管理户部事务上书房总师傅翰林院掌院学士兼管顺天府府尹事务随带加五级纪录十八次臣贾桢总裁官经筵讲官吏部尚书镶蓝旗汉军都统管理新营房城内官房大臣稽察内七仓大臣稽察会同四译馆事务加一级随带加六级军功加三级纪录五次臣花沙纳经筵讲官文渊阁提举阁事兵部尚书总管内务府大臣镶白旗满洲都统稽察内七仓大臣管理宗人府银库左翼幼官学宁寿宫圆明园等处精捷营御茶膳房御药房太医院造办处事务随带加十八级臣阿灵阿副总裁官经筵讲官兵部尚书随带加六级纪录二十次臣周祖培等奉敕修

道光二十二年。壬寅。十二月。乙亥朔。谕内阁、固庆等奏、请将捏报患病之郡王台吉交议一摺。土尔扈特协理台吉敏珠尔多尔济、沙津得勒格尔、例应随同年班进京。补行引见。据该盟长等咨报患病。经该大臣等验明。沙津得勒格尔尚有病形。著准其俟明岁随同进京。其敏珠尔多尔济一员。现据验无病形。乃抗不遵行。竟回游牧。该郡王多诺罗布多尔济。身任盟长。并不催令起程。复代为捏报。多诺罗布多尔济、敏珠尔多尔济、均著交该部严加议处。

○停阅八旗及内务府三旗冰技。仍给半赏。

○丙子。改铸山东曹州府曹单水利通判关防。从前署巡抚麟魁请也。

○丁丑。礼部奏、道光二十三年元旦应行礼仪。得旨、照例行礼。奉皇太后懿旨、停止筵宴。其在外公主福晋命妇进内行礼之处。并著停止。

○戊寅。谕内阁、兵部奏、遵旨核议上海宝山失事各员。请革职治罪等语。吴淞营守备请升南汇营都司易占魁、吴淞营参将升任苏松镇总兵周世荣、署川沙营参将事提标左营游击崔吉瑞、署提标右营游击事抚标中军参将封耀祖、均著即革职。所有应得罪名。著刑部定拟具奏。其调派防剿之各路带兵将备。仍著该督确查。补行送部核议。

○又谕、兵部奏、遵旨核议厦门防堵不力各员。请革职治罪等语。福建署水师提标中军参将事南澳镇左营游击陈胜元、署水师提标右营游击事后营游击杨靖江。著一并革职。其应得罪名。著刑部核议具奏。

○又谕、福建水师提督窦振彪、前因厦门失守。降旨交部严加议处。经该部议以革职。实属咎所应得。姑念厦门失守之时。该提督巡洋外出。且厦门即时收复。窦振彪著加恩改为革职留任。八年无过。方准开复。该提督惟当感知奋。激发天良。于海疆操防事宜。倍加整顿。图后效而赎前愆。

○又谕、前据御史石景芬奏、直隶冀州知州赵庭椿、藉团练乡勇为名。按户勒派等情。当交讷尔经额查办。兹据查明该州招募土兵。系照原稟章程办理。并无按户挑派三丁抽二。勒索滋扰情弊。惟因乡地陈奎聚阻挠顶撞。辄用旧有加重木枷枷号。虽非违例私制刑具。究有应得之咎。赵庭椿著交部议处。

○以通政使司副使刘谊。为宗人府府丞。

○以捐修喀什噶尔城垣仓廩等工。赏六品伯克密尔阿比提买斯瓦特等蓝翎。余升用加衔有差。

○己卯。上诣皇太后宫问安。

○谕内阁、富勒敦泰奏、筹款归补防堵官兵口粮等项银两一摺。山海关续次防堵官兵借拨税务盈余银一万五千两。除支过口粮脚价等项。尚存银二十一四十二两零。著交山海关监督归款。其支过银一万二千八百五十七两零。著准其将前次发商生息一半归款银两暂停归补。先还借拨税务盈余银两。按年尽数扣还。解交该监督查明。以清借项。其发商生息归本停扣银两。俟借款归补完竣后。仍照原案按月扣还。所有续次支过口粮等项银数。俱著据实造册报部核销。

○又谕、奕经等奏、请将革员暂行开复顶带等语。四川已革广元营游击梁有才、现带屯土官兵由浙江撤回归伍。准其暂行开复游击顶带。带兵回营。以次弹压。所有该革员浮开船价一案。著俟归伍后仍由宝兴讯明办理。寻奏、梁有才所带弁兵。现已归伍。浮索船价一案。业经参革。应毋庸议。仍摘顶带。下部知之。

○谕军机大臣等、达洪阿等奏、相度地势。渐次撤兵。并将各起逆案动用道库银两。并入防夷案内造报等语。台湾两年以来。剿办各起逆案。动用道库备贮经费。本应专案报销。据达洪阿等奏、多与防夷事务牵涉。难以分晰造报。著照所请、准其并入防夷案内一体造报。所有各口雇募设守之乡勇水勇人等。准其相度形势。渐次裁撤。仍应加意巡防。期于有备无患。将此谕令知之。

○修湖北潜江县护城堤工。从总督裕泰请也。

○缓徵福建长汀、上杭、二县及峰市县丞所属被水灾区额赋。给房屋修费及口粮。

○庚辰。孝惠章皇后忌辰。遣官祭孝东陵。

○谕内阁、前据耆英奏、续查上海宝山失守各员。请分别降革议处等语。当降旨交该部议奏。兹据吏部按例定拟具奏。宝山县知县周恭寿。系守土之员。署主簿金文焕。分应协防。典史胡长庚。失守监狱。均著照例革职。上海县县丞庆仁。主簿李国璜。先经奉委离境。与同城失守者有间。著照部议降三级调用。无庸查级议抵。李国璜无三级可降。著即革职。其周恭寿应得罪名。著刑部核议具奏。以上各员。均不准其留办善后事宜。至兼辖上海宝山之知府知州。并同城之佐贰官。及吴淞司巡检。应议各职名。著该督一并查明咨部另议。

○又谕、前据怡良等将福建厦门防堵不力之文武各员据实参奏。当降旨交该部议奏。兹据吏部按例定拟具奏。前任兴泉永道刘耀椿。厦门同知顾教忠。同安县知县盛朝辅。石浔司巡检金光耀。均著照部议革职。厦门地方虽无城池。顾教忠以专防同知。较之兼辖道员。及并未驻劄之地方官。责守较重。应如何治罪之处。著刑部核议具奏。该管泉州府知府。亦有应得之咎。著怡良等查取职名。咨部另议。

○谕军机大臣等、裕泰奏、拟造防江战船一摺。据奏湖北省所辖岷江迤长二千余里。设有宜昌镇标及荆州汉阳各水师营。战船不能载炮。现拟制造开浪船。绘图呈览。朕详加披阅。制造之法。未能尽善。即如摇橹之人。显露在外。令人一望而知。先受其害。上面尖顶人字罩篷。用竹排钉。炮手人等即伏其下。断不能遮蔽枪炮。且船上祇安橹

八枝。炮八位。断难抵御夷船。若以为捕盗之船。则盗船率多轻便。以我长六丈之师船。追赶彼船。势难得力。现有广东匠役何礼贵。能造火轮及各式战船。已饬令前赴湖北。交该督面加询问。兹先发去广东所进造船图说二分。该督接奉后即行钞录存查。原图说遇便封缴。俟何礼贵到时。该督酌量何项战船利于长江驾驶。即令何礼贵就海船式□□。量为变通。务期木料坚实。机关灵捷。方能适用。至何礼贵栖为夷人造船之人。此时既为我用。不便以罪人羈禁。惟令其安心服役。密为看管。勿令与外人交接。或至乘间脱逃。是为至要。至所请海疆造船。免其调取楚省木植之处。览奏已悉。将此谕令知之。

○又谕、造船匠役何礼贵。现在谕令李星沅于赴陕之便。带至河南地方。转送湖北。著鄂顺安饬属探明该抚经过河南境内时。即派委妥员。将何礼贵送至湖北省城。交与裕泰听候差使。务饬接送之员。沿途妥为照料。毋稍疏虞。将此谕令知之。

○辛巳。谕内阁、兵部奏、阵亡之瓦寺土守备哈克里一员。据四川总督宝兴咨称、实系空衔。并未管理屯务。请将议给世职之处注销等语。自系照例办理。惟念该弁虽系空衔。其临阵捐躯。忠勇之忱。与实缺者同堪悯恻。哈克里著仍照实缺例给予世职。以示朕破格施恩。激励将士之意。所有多给恤赏银一百两。亦著毋庸扣减。其造册错误各员。并著免其查取职名议处。

○命署漕运总督工部尚书廖鸿荃来京。以署太常寺少卿李湘棻。署漕运总督。

○以故云南赵州属定西岭土巡检李泰源弟硕源。袭职。

○命留海疆经费及续捐银二十二万六千两。暂贮南河河库备用。

○壬午。上诣大高殿行礼。

○谕内阁、本年届应军政之期。兵部将在京之都统、护军统领、副都统、右翼总兵、銮仪使、内务府护军统领。在外之驻防将军、都统、副都统、领队大臣、提督、总兵。分晰开缮履历清单进呈。朕详加披阅。内镶黄旗汉军副都统苏隆阿、内务府镶黄旗护军统领福桑阿、福州副都统额勒锦、年力就衰。正黄旗蒙古副都统玖泰、正黄旗汉军副都统伦忠、镶蓝旗汉军副都统喀拉春、人甚平庸。均著以原品休致。余著照旧供职。其造册迟延之广西提督达里保、湖南永州镇总兵英俊、著交部议处。浙江提督李廷钰、福建台湾镇总兵达洪阿、杭州将军特依顺、副都统恒兴、并古城等处领队大臣造册迟延。均属有因。著加恩免其议处。广东碣石镇总兵李贤、琼州镇总兵鲍起豹、高州镇总兵赵承德、该三员履历均未依限报部。是否由军营甫经撤防。著两广总督查明送部。照例办理。

○又谕、周天爵奏、请将溺职苟免之卫守备革职拏问一摺。镇江卫守备耿国荣。于夷匪攻破城池后。未能致命殉节。乃迟至半月有余。复又携眷出城。以致钱粮案卷均被遗失。所供在署固守。及后被掳掠之处。必有不实不尽。耿国荣著即革职拏问。交江苏巡抚提同书吏人等严切讯究。并将被掠钱粮查明确数。损毁案卷共有若干。按律定拟具奏。

○又谕、法丰阿奏、遵查喇嘛安静悔过一摺。前因干珠尔巴诺们汗。违例私开牧场。降旨革去该诺们汗封号。飭回游牧。并令该大臣察看能否改过。于一年后奏明请旨。兹据

奏称、该喇嘛回牧后。一年以来。实在安静悔过。毫无违犯。干珠尔巴、著施恩准其开复。

○调察哈尔副都统敬<?穆-禾父>、为福州副都统。镶白旗汉军副都统阿彦泰、为察哈尔副都统。

○以正红旗满洲参领海禄、为正黄旗蒙古副都统。兵部右侍郎惟勤、兼正黄旗汉军副都统。

○命和硕额駙恩醇、在散秩大臣上行走。

○予江苏睢宁县明总兵官周遇吉、建立专祠。官为祭祀。从巡抚程裔采请也。

○科尔沁卓哩克图亲王巴图等五人、乌珠穆沁扎萨克车臣亲王彭苏克纳木济勒、喀喇沁扎萨克都楞郡王色伯克多尔济等二人、奈曼扎萨克郡王阿宛都瓦第扎布、苏尼特扎萨克郡王布尔呢锡哩等二人、阿巴噶扎萨克郡王阿尔塔什第、扎赉特扎萨克贝勒额外侍郎拉木棍布扎布、阿巴哈纳尔扎萨克贝子伊达木扎布、喀尔喀扎萨克贝子德勒克多尔济、敖汉头等台吉布彦德勒格呼固鲁克齐、巴林二等台吉扎勒沁扎布、于神武门内瞻覲。

○癸未。谕内阁、镶黄旗满洲都统奏、革任轻车都尉原缺。应如何承袭之处请旨一摺。都司德堃。因在浙省接仗退散。发往新疆。例不准伊子承袭。惟其立职之原任湖南提督海凌阿。曾因剿杀逆瑶赵金陵等阵亡。深堪悯恻。而其别房又不应该承袭。设以德堃获罪。不准伊子承袭。则念及海凌阿阵亡之处。朕心深为不忍。著加恩将所遗一等轻车都尉。飭令该旗仍行拣选德堃之子。带领引见。用示朕轸念茆臣至意。



○谕军机大臣等、有人奏、广东香山、新会、顺德、高要等县。盗犯横行无忌。地方官置若罔闻。请飭查办等语。著祁<?土贡>、梁宝常、按照摺内指出各案。严切查明。据实参奏。并严飭各该地方官上紧缉拏。按律惩办。以安商民。毋任讳饰消弭。将此谕令知之。寻奏、遵查各案。该州县尚无消弭事情。惟粤东素多盗匪。入春以来。稍为敛迹。惟有认真缉捕。举行团练。以靖地方。得旨、严行督缉。不可懈弛。勉之。

○以正蓝旗护军参领萨炳阿、为镶黄旗汉军副都统。伊犁领队大臣长清、为镶白旗汉军副都统。调镶蓝旗蒙古副都统维禄、为镶蓝旗汉军副都统。以头等侍卫齐克唐阿、为镶蓝旗蒙古副都统。

○以镶黄旗汉军副都统刘钺、署正白旗蒙古副都统。

○给浙江鄞、镇海、两县被兵灾民三月口粮。蠲缓大嵩。清泉。龙头。穿长。石堰。鸣鹤。芦沥。鲍郎。海砂。玉泉。黄湾。十一场及坐落江苏远浦。青村。横浦。浦东。下砂头二三等场。新旧额课有差。

○甲申。上诣皇太后宫问安。

○命新授正黄旗蒙古副都统海禄、仍回参领本任。以呼伦贝尔总管丰伸、为正黄旗蒙古副都统。

○以缉获贼犯。予索伦营总管佛尔金布优叙。赏哈萨克阿哈拉克齐阿吉蓝翎。六品顶带。

○予故湖北郟阳府知府陈天泽、陕西汉中府知府郭维暹、署四川江油县知县王统、署河南虞城县知县周振之、入祀名宦祠。江苏故户部主事潘世璜、江西故四川合州知州纪大

奎、山西故广西永淳县知县常煜、福建故侯官县训导林锡龄、河南故温县监生原恂、入祀乡贤祠。从总督宝兴、富呢扬阿、巡抚赵炳言、鄂顺安、程裔采、吴文镛、梁萼涵、刘鸿翱请也。

○乙酉。上御乾清门听政。

○谕内阁、前因御史黄铭先奏、山西平定州民人窦计小子被殴身死一案。窦计小子现在存活。当有旨交梁萼涵将该民人访获。彻底根究。严审定拟。兹据梁萼涵审出确情。请将承审审转各员。分别严议议处。此案原讯杨稳主使杨张保抓伤窦计小子肾囊身死。业将杨稳拟绞处决。兹据该抚查明。死者实系病毙无名男子。从前审办错误。致将罪应拟军之杨稳拟绞已决。非寻常疏忽可比。前任山西平定直隶州知州庆霖。相验不实。失入死罪。前任太原府知府王有壬。奉驳覆审。不能审出实情。均著交部严加议处。前任山西按察使瑞元。审转不实。著一并交部严加议处。

○谕军机大臣等、耆英奏、查明上海宝山及吴淞口情形一摺。吴淞口外。为由海入江必经之路。现在水师废弛。不独巡洋未能得力。即江防亦属无备。思之令人寒心。该督议将外海内河额设战船实数。并水师各营原有马匹。酌量变通。然后整饬会哨。以冀补牢。著俟履勘各要隘形势。再行通船筹画。奏明办理。将来制造船只。必须木植坚实。运用灵捷。方能得力。若拘守旧制。名为修理战船。其实无济于用。又复何所裨益。至另片奏、拟酌提宝苏局洋铜数十万斤。铸造大炮。并咨会河南代造擡炮等语。制造炮位。无论铜铁。总以精炼为要。非必专用铜炮。始能及远命中。且购办铜斤。不如购办精铁之易。苏局现在所贮洋铜。自应仍留备鼓铸钱文。该督等增铸大小炮位。惟当广购精铁。加工镕炼。并调取广东熟谙铸炮工匠。如式

制造。务期一炮得一炮之用。方为妥善。其擡炮一项。以体质轻固者为得用。该督因江苏所造未能如法。已咨河南巡抚。责成河北镇昌伊苏代造擡炮一千五百杆。亦著照议办理。惟三十斤之炮。尚恐运动未能灵便。若每炮再减六七斤。运用时当更得力。并著该督咨会河南巡抚照办。将此谕令知之。

○又谕、前因夷酋口口朴口口鼎喳投递照会。诉称台湾镇总兵达洪阿等贪功妄杀遭风难夷。当令怡良渡台查办。兹据耆英奏、询问李廷钰、苏廷玉等。均有夷船遭风漂至台湾。被居民关闭村中。该镇道再三向索。始行交出。迨闻该夷正法。居民等有夷船若来。惟有戕官以图解免之语。计怡良已启程渡台查办。或从兵民暗访。或向官更明查。务得实情。毋稍徇隐。将此由五百里谕令知之。

○以奉天府府尹赓福、为内阁学士。兼礼部侍郎衔。太仆寺卿斌良、为通政使司通政使。甘肃宁夏道吉年、为奉天府府尹。

○以翰林院侍读学士孙瑞珍、为太仆寺卿。

○以内阁学士舒兴阿、兼署正黄旗蒙古副都统。

○赏江南提督尤渤花翎。

○以拏获邻境贼犯。予巡捕南营守备穆腾额等议叙。

○拨江苏泰州等九州县漕粮二万余石。支放帮丁行月等米。

○丙戌。谕内阁、特依顺等奏、乍浦满洲营设有公济银六千两。向为红白赏恤之需。现因被兵以后。应行扣还银两。为数无多。不足以供支借。请饬部筹议等语。著该部议

奏。该营额设军器。现存无几。自应补造齐全。俾资操演。除应归官为修制者。仍由承办各衙门动项修制。其向由官兵自修自制各件。现在官兵力有未逮。著准予军需局制存各军器内分别拨给应用。俟将来遇有损坏。再由各官兵自行修整。

○又谕、耆英等奏、变通水师章程等语。水师弁兵。自以讲求驾驶舟楫。辨识风云沙线。熟习大炮乌枪为要务。近来员弁缺出。皆于弓箭兵内考拔。以致弁兵皆习弓马。而于水务抢炮均不练习。若不亟予变通。何以洗积习而收实效。该督奏请嗣后水师营将备员弁。专取水务枪炮。即骑射生疏。亦准录用。并将赴部之员由部阅看乌枪。如果精熟有准。再准引见之处。著兵部核议具奏。并著妥议简明章程。通行沿海各省。一例照办。以肃军政。

○谕军机大臣等、祁<?土贡>等奏、民夷因事争闹。及夷楼失火被抢一摺。此次夷人强买民人食物。致相争闹。是夜夷楼失火被抢。经该地方官弹压救护。旋据该酋口□朴口□鼎喳询问此事。该督正言回覆。所办甚是。粤省士民。因该夷情形傲慢。激成公忿。迥非藉端滋事者比。伊里布将次到粤。著即会同祁<?土贡>。梁宝常。细心秉公妥为办理。总当使该夷输服。不至有所藉口。尤不可屈抑士民。使内地民心。因而解体。方为妥善。所奏团练情形。声势联络。一呼即集。甚属可嘉。单开出力各员。自系遵旨查奏。原单暂存。仍著伊里布等剴切晓谕各该员。但当妥为管束。期于御系有资。断不可亟于邀功。借事起衅。如果始终勤奋。著有成效。著即会同该督抚等据实保奏。候朕特沛殊恩。另摺奏制造船只事宜。请停止拆造师船。以期节省。并将报捐银两。作为造船费用等语。著俟造成一二只后。眼同试练。施放大炮。能否便捷。再行奏明兴办。将此由四百里谕令知之。

○又谕、耆英等奏、请造同安梭船一摺。粤省寄到船图。既于江省外海内江。均难得力。自可无庸制造。据奏同安梭船。于该省江海均资利用。现嘱浙江提督李廷钰。于赴任之便。带同同知沈炳垣等绕道上海。既就民间船厂匠工木料。先行筹款。成造同安梭船二只子船四只试练等语。著即照议办理。俟造成一二只后。即于该省江海之交。先行演试。如果驾驶便利。安设炮位。施放得力。再行派定只数。奏明兴办。嗣后江浙制造船只。即责成李廷钰一手经理。如有文员造不如法。武弁有意挑剔。即由该提督咨会参办。务将从前恶习一力湔除。以期得收实效。前有旨谕知宝兴。令于川省豫备木植。以待沿海各省调取。此次江省造船。倘木料不敷。即向四川咨取应用。其各营原有〈舟古〉船等项。准俟新船造成后。再行裁汰。综计经费。妥议章程具奏。将此谕令知之。

○又谕、本日据祁〈?土贡〉等奏、制造船只事宜。遵旨咨商两湖四川。将可造大船坚实木料。俟体察实在可用。即分别咨取等语。造船木料。前据宝兴覆奏。业于泸州等处标记杉木数百株。柏木数千株。备海疆随时调用。将来广东咨取到时。著该督即查照粤省咨调根件丈尺。妥为运送备用。至湖广省现因议造防江船只。需用材木。昨经裕泰奏准免令海疆调取。将来粤省咨取到时。仍著裕泰随时斟酌。是否尚敷协济粤省之处。自行咨覆。将此谕令知之。

○贷乍浦驻防修理衙署兵房俸饷银。

○给江苏上元县被兵灾民一月口粮。并房屋修费。

○丁亥。谕内阁、嗣后致祭先师。著太常寺将满汉大学士、协办大学士、六部尚书、通行开列具题请旨。

○戊子。旌表守正捐躯河南陈州府民朱夯妻齐氏。

○己丑。谕军机大臣等、贺长龄奏、演放炮位。并将废铁改铁擡炮等语。行军制胜。火器为先。除乌枪擡炮常年操演外。该抚请于每年冬操时。将大炮演放一次。俾臻熟练。著依议行。至废铁改铁擡炮。是否尚堪抵用。黔省跬步皆山。所制擡炮。自以轻捷便利。施放有准为要。大约至重不过二十三四斤。即可适用。倘过于笨重。转恐运用不能得力。以致有名无实。将此谕令知之。

○又谕、据孟保等奏、官兵歼毙森巴番夷贼目。取据各部落永不滋事甘结。现已撤兵归伍等语。防边之道。抚驭为先。该番夷等时常滋事。自不得不加以惩办。惟恐该噶布伦等因偶获胜仗。辄邀奖励。或致借端启衅。构怨不休。俾番夷等屡图报复。勾结各夷。别生枝节。不可不防其渐。此时既具永不滋事甘结。自应妥为安抚。以期日久相安。著该大臣等剴切晓谕该噶布伦等。嗣后惟当严加防范。毋令生番再行窜入边界。但不可轻举妄动。再生事端。倘经此次谆谕之后。仍敢借事贪功。不顾后患。恐恩奖亦不能再邀也。将此谕令知之。

○又谕、特依顺奏、校阅八旗官兵操演枪炮中靶成数。并请于广东解到大炮内拨出八位。归于杭州满洲营操用等语。此项广东解到大炮二十位。其轻重大小。既与杭州满洲营原设之红彝炮相等。即著全数归于杭州满洲营。每年拨出八位。于九月间演放。按年轮流。周而复始。于操防更有裨益。该将军等务当督率弁兵。认真操演。一律精熟。俾火药不致虚糜。演放得收实效。是为至要。将此谕令知之。

○又谕、盛京将军每岁冬间进鲜。前曾降旨发去朱笔改订清单一件。著禧恩遵照办理。兹据该将军将原单呈缴。朕详加阅看。再行酌减。自道光二十三年为始。即照再减之数呈进。著为例。将此谕令知之。

○直隶总督讷尔经额奏、天津大沽南北两岸。暨迤南至狼坨子一带。天津镇总兵足资控驭。惟北塘五十余里。距宁河县城二十余里之芦台地方。为北塘后路。南界天津。东北毗连丰润永平府一带。西北地接通州。实属扼要之区。请以新添总兵驻劄芦台。名为通永镇总兵官。将北塘海口丰润玉田采育三河宝坻张湾等营。通州协。通州协右营。暨提标山永协。并所属山海石门二路。蒲河乐亭二营。共十五协营。均归统辖。于芦台安设中左右三营。左营应设总兵之中军兼左营游击一员。左营守备一员。右营都司一员。并左右两营分设左哨千总二员。右哨千总二员。头司把总二员。二司把总二员。又分防把总二员。经制外委六员。添设游都守千把外委共十九员。核计裁撤伊犁镇标之游击等缺移抵外。尚不敷守备一员。千总一员。即于直隶简僻营分内裁拨移驻。并将新设镇标之分防把总二员。拨驻新河营城二汛。将原设之经制外委二员。撤归镇禁差操。其芦台之专汛千总一员。即归新镇右营都司兼辖。中左右三营。拨兵一千名。专操水陆技艺。除芦台本有专汛千总存营兵八十名外。尚需兵九百二十名。查芦台营游击驻劄北塘。计存营兵一千一百二十四名。新镇现驻芦台。为北塘后劲。拟将驻劄北塘之芦台营游击作为北塘营游击。仍驻北塘。于存营兵一千一百二十四名内拨兵六百二十名。移驻芦台。其不敷兵三百名。拟于大沽协左右两营。暨葛沽营新兵内拨兵三百名。共一千名。连北塘之兵五百零四名。作为新镇亲标。统计拨归新镇兵五千四百八十六名。仍归旧镇管辖兵七千五百零四名。下军机大臣等议。从之。

○调直隶正定镇总兵官向荣、为通永镇总兵官。以陕西潼关营副将万福、为正定镇总兵官。

○以翰林院侍讲学士王广荫、侍讲孙葆元、充日讲起居注官。司经局洗马何桂清、翰林院编修朱庆祺、署日讲起居注官。

○免云南铜厂民欠无著工本银。



# About this digital edition

This e-book comes from the online library [Wikisource](#)<sup>[1]</sup>. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](#)<sup>[2]</sup> license or, at your choice, those of the [GNU FDL](#)<sup>[3]</sup>.

Wikisource is constantly looking for new members. During the realization of this book, it's possible that we made some errors. You can report them at [this page](#)<sup>[4]</sup>.

The following users contributed to this book:

- 
1. [↑ https://wikisource.org](https://wikisource.org)
  2. [↑ https://www.creativecommons.org/licenses/by-sa/3.0](https://www.creativecommons.org/licenses/by-sa/3.0)
  3. [↑ https://www.gnu.org/copyleft/fdl.html](https://www.gnu.org/copyleft/fdl.html)

4. [↑ https://wikisource.org/wiki/Wikisource:Scriptorium](https://wikisource.org/wiki/Wikisource:Scriptorium)